



Martin Warner di Scol Practico pa Ofishi Sta. Cruz

"Nos scol ta logrando hopi bou manejo di Minister Hooyboer"

GOBERNADOR di Aruba y **Minister di Enseñansa**, Michelle Hooyboer-Winklaar recientemente a firma e decreto gubernamental pa oficialisa Scol Practico pa Ofishi (SPO). Enseñansa Secundario Special tabata resorta pa hopi aña bou di e manejo di SEPB y tabata carga e nomber di Aspirantopleiding. Den transcurso di añanan a mira cu e concepto aki no a resulta positivo den practica dor di diferente factor. Na aña 2013 Gobierno a tuma e decision pa tuma e manejo di Aspirantopleiding for di EPB y traspaso pa Dienst Publieke Scholen (DPS). A muda Aspirantopleiding di EPB San Nicolas completamente pa un localidad temporal na Savaneta.

Banda di e proceso di independisacion cu ta wordo guia dor di e stuurgroep tin e proyecto di e localidad nobo pa SPO Pariba cu mester start muy pronto. Tin e fondonan aloca y awor hunto cu DOW y InfraTeam mester cuminsa e preparacionnan y apunta un lugar adecua cu por construi e localidad nobo. Director di SPO, Alexander Figaroa, ta hopi contento di por mira cu Minister Michelle Hooyboer Winklaar a tuma e formacion y completacion di SPO hopi na serio y ta sigur cu lo sigui cu cambionan hopi positivo cu ta den bienestar di e alumno cu merece mucho mas mihor.

"Un otro proceso sumamente importante r'esun di e revision di e curiculo y tur loke tin di haber cu e organisacion di e contenido di e programanan. E asina yama inhoudelijke vernieuwing lo tin su impacto riba ful e organisacion y facilidadnan necesario p'e scolnan", asina Alexander Figaroa a sigui comenta. E localidad di Santa Cruz tin mester di mantenemento y un posibel expansion. Martin Warner, coordinador na Scol Practico pa Ofishi Santa Cruz ta indica: "Hopi cos cu nos no por a logra antes, cu yudansa di Minister Michelle Hooyboer Winklaar nos ta logrando".

Minister Michelle Hooyboer-Winklaar ta reconoce cu tin hopi trabou pa realisa, pero ta sumamente entusiasmo cu e oportunidadnan nos dilanti. "E grupo di alumno aki ta hopi special y tin hopi potencial. Nos mester duna e alumnonan aki e nivel di educacion y cuido cu nan merece".